

Newspaper	UTUSAN MALAYSIA
Date	23 JUNE 2016

Emosional setelah gagal jatuhkan Perdana Menteri

Dr. Mahathir sanggup gadai prinsip sendiri

UM - 23/6/2016

Oleh **HUSSAINI AMRAN**
pengarang@utusan.com.my

■ KUALA LUMPUR 22 JUN

BEKAS Perdana Menteri, Tun Dr. Mahathir Mohamad sanggup mengadaikan prinsipnya sendiri apabila bersekongkol dengan DAP yang nyata menjadi musuh Islam.

Mursyidul Am Pas, Datuk Dr. Haron Din berkata, tindakan Dr. Mahathir mencabuli prinsip yang dipegangnya selama ini akan mengundang banyak perkara negatif.

“Bersahabat baik dengan musuh Islam, kita akan jadi seperti mereka juga.

“Oleh itu, adalah lebih baik untuk kita balik mempertahankan syariat Islam dengan mengutamakan ukhuwah atau persaudaraan yang berteraskan kepada hukum-hukum syarak dan menjauhi diri daripada tindakan yang mengundang kemurkaan Allah,” katanya ketika dihubungi *Utusan Malaysia* di sini hari ini.

Semalam bekas Ketua Hakim Negara, Tun Abdul Hamid Mohamad memberi amaran bahawa tindakan Dr. Mahathir bersekongkol dengan DAP dan PAN akan membawa kemudaratannya lebih besar kepada orang Melayu.

Haron yang juga Ketua Kluster Dakwah Majlis Perundingan Islam



DR. MAHATHIR MOHAMAD


(MPI) berpandangan, Dr. Mahathir mungkin bersikap emosional kerana hasratnya untuk menukar Perdana Menteri, Datuk Seri Najib Tun Razak tidak berjaya.

Beliau memberitahu, hasrat Dr. Mahathir sebelum ini dikatakan semuanya dapat dicapai.

“Apabila hasratnya untuk menukar Perdana Menteri tidak berhasil, maka semuanya telah berubah,” jelasnya.

Menurut Haron, sebagai seorang ahli politik veteran yang matang, Dr. Mahathir sepatutnya tahu apa yang beliau lakukan.

“Perjuangan untuk memartabatkan Islam melalui perpaduan sepatutnya menjadi keutamaan Dr. Mahathir dalam umur yang begitu lanjut,” katanya.



HARON DIN

Tindakan Dr. Mahathir mencabuli prinsip yang dipegangnya selama ini akan mengundang banyak perkara negatif. Bersahabat baik dengan musuh Islam, kita akan jadi seperti mereka juga.”

HARON DIN
Mursyidul Am Pas